

編號 1 號

【老葉壯新枝旺】劉玉蕉原作

係風个撩弄，抑係魚仔在水肚洄，探出水面澄澄企个蓮花枝莖，緩緩起舞咧，佢定定仔搖擺高溜个枝莖，頂高个大皮葉，就像掀書樣仔，一葉貶過一葉！等歸夜正承著來个鑽石，跔等一粒一粒仔碾落窟肚，水肚个魚陣，遽遽撻來鋪在水面个荷葉，趕過來承，承著咧，晟光个鑽石還係錫人个金皙皙，輪落¹窟肚水肚个就變做魚陣个凉水。

一窟水，毋係陂塘毋係湖，原旦係園水浸樹材个所在，林業沒落了後，這窟水係死水，係荒忒个濫泥。年視年，任佢野草莽生²，蟲、蛎在窟肚樂暢唱歌。荒廢多年都無人搭，係哪日起勢，毋知哪個天才，在濫泥个一角，試等種落希望，麼人會想著正幾年仔，就遭到歸窟仔哩！到這下，歸大片个蓮花，年年在熱燻燻仔个天時接等上場，厥个嬌、厥个羞，園在花苞肚，一伸出水面就錫人愛憐！天甫光露水言散，該像新嫁娘樣仔个蓮花就偷偷仔開花，點過胭脂个面容，定定仔開展、開展，澄線个枝骨、淡淡个清香，錫來蜂蝶、招來讚嘆个話語，等到靚過花謝落濫泥，硬

¹ 輪落：音 lin log；滾入。

² 莽生：音 mang` sang'；雜亂生長。

頸个枝莖還係承載守顧个任務，頂高个蓮蓬係胞衣，蓮子係嬰兒，蓮子言熟進前，佢堅心³守顧，直直到蓮子掙出、碾落窟肚生根暴芽，佢正功成身退、企死⁴濫泥肚。

涼爽个東勢、人文个山城，因致這萬般風情个蓮花生態水窟，還過毋係森林叟有同森林共級數个園區，這幾年錫來毋會少个外地客來賞花、遊柰。如今，東勢林業文化園區係有名个休閒、賞蓮花个景點。打早，風涼涼仔，跔等窟脣个步道隨在你大步行、定定仔行，樟樹、茄苳、柿仔樹……會摻你遮蔭，樹頂高个蟬仔⁵，唱歌同你相隨，鶯鶯仔咕咕係伴奏，水窟个水無異清，映毋出白雲个悠閒，叟顛倒分好搞个魚陣攏到汶汶，水面揚尾仔迂來迂去，毋會暈山也毋會撞壁。風涼涼、心清清坐在窟脣石面，毋多知仔，一坐就半朝脣。

目珠旅行心散步，在這生態池你看著个係蓮花个一生，心恹想个係僇人个一生，同這靚靚个蓮花共樣，生命个起點同結束大家都共樣，落腳所在孤孤決定肢骨係毋係砸礮。濫泥肚个蓮藕佢會尋肥泥鑽，共樣開出清淨个大蕊靚花，僇人也共樣，出路就在面前，胸脯挺起來，大步踏出去，屬於若个靚花也跔等就會開！

³ 堅心：音 gien' xim'；信念堅定的。

⁴ 企死：音 ki' xi'；直立的植物自然死亡。

⁵ 蟬仔：音 sam' e'；蟬。

編號 2 號

【收字紙】溫筆明原作

「滿腔心事熔爐火，萬丈煙光射斗牛」，偈佬著係哪家人个對聯，朋友笑偈毋係眼茫茫就係無讀書，又係煙光又係爐火該講法明明就係敬字亭，正會滿腔心事送化存神。原來，敬字文化个根還在，比起金爐燒金个祈求還較高明，愛深深佩服莊中先輩个智慧，曉得教人敬字惜字得聰明，還留下恁多敬字亭就係鐵打个事實。

記得，四五十年前有人發願掙字紙籃仔收字紙，像武俠小說裡肚个人物共樣，著等寬鬆輕便个衫褲，一雙平底个烏布鞋，戴一頂笠嬬，用八尺長个竹棍來掙擔，掙等會同人平高个字紙籃仔，籃仔頂用紅紙烏字寫等「敬惜字紙」、「尊古聖賢」，逐隻月固定兩個時間出來奉公，像苦行个出家人樣仔，一步一腳印，對莊頭行到莊尾，一戶一戶仔收，連寺廟佛堂都無漏忒，甚至會用圓糖仔錫細人仔來配合，達成敬惜字紙个目標。字紙收湊地毋係掙去銀行換銀票，係四五六總歸么¹，全部掙去繳分敬字亭，先請祝融將軍一一火化清點，再請制字先師倉頡聖人監納，虔誠敬

意收字紙，送化存神一條心，顯現出愛惜字墨尊敬聖賢个本心，年復一年從來毋識推懶過，該種精神分人欽服。

借問一下，今這下還有看著這種人格者無？正式當像講古樣仔，愛再尋著這種鏡頭該就難字一隻，怪就愛怪時代變化恁大，對單純个農業社會轉變成競爭激烈个工商社會，收字紙个頭路分資源回收个口號回收走地，名話教育普及，敬惜字紙个文化嘎跔西洋化个大水流走地。敬字亭本本企在該跡位，風來風吹、雨來雨打，加上日頭來日頭晒，怕有盡多个無奈，失忒往日燒化字紙个光彩，有兜仔孤栖還過異大个失落，毋過，係講做得，政府牽頭帶路，將收字紙个文化重新掙金招牌，重新發揚該種精神，甚至列入重要文化遺產，好好傳承下去。

收字紙收个毋單淨係字紙，收个係一種淨淨个心靈，收个係一種做毋得跌忒个風範，收个係千金難換个文化資產，值得大家共下來重視。

¹ 四五六總歸么：音 xi ng` liug` zung` gui' ieu'；術語，莊家通吃。

編號 3 號

【陪伴】曾菁怡原作

春光明媚个朝晨，日頭絲仔輕手輕腳對葉縫鑽過，掖下一地燒暖个金黃。樹桮隨風輕輕仔搖擺像係摺摺兜攢手，花開鳥仔唱歌，恁好个天時莫打爽，這係散步个好時節。

佢轉身看你，期望你有同佢共樣个想法。坐在桌仔脣个你，還目盯盯看等食朝過後个碗筷，嘴糜啊糜，係回想食過麼个？還係回想食過旨？啟一下氣，佢行在若脣項跔下來，拈忒若嘴角个一粒飯糝，低言細語講：「佢來去散步哩啲。」

雖然日頭帶來一息仔燒暖，但係早春个風還係清冷清冷。佢對壁頂个掛鉤摺若吊菜色个氈帽同大紅外衫拿下來，細心細意摺若帽仔戴正、外衫著好勢，鈕仔一粒一粒鈕好來，上上下下摺你巡過一擺，確定你著燒咗、定貼咧，正牽等你出門。大門「咿——呀——」打開，朝陽既經鋪好金色个地毯等候哩！

還細个時節，同你手牽手散步係佢盡幸福个時間，你牽佢行過街頭路尾，教佢樹頂嘅嘅滾个喊做伯勞嫲，惡擎擎會逐人个係阿啾箭，還有牛牯盡惱著紅衫个人，叮嚀佢絕對愛細義；上店仔有戴目鏡个係頭家，逐擺都好心分佢兜賒數，故所看著佢愛好禮

相借問；屋前綯一隻肥卒卒黃狗个係阿蘭姨屋下，佢係阿姆你盡細个老妹，煞猛又溫柔，畜豬割草樣樣會。佢一路行一路譚多，若手巴掌个溫暖、朗朗个笑聲深深刻在吾記憶裡肚。

這下，佢行在共樣个街頭路尾，你講行到這頭樹下愛細義，該隻牛牯當綻頭，輒輒都會飆出來嚇人；你講上店仔到咗，愛去摺頭家拆數，無會對佢敗勢；你講阿蘭姨刷一隻雞仔分你，喊你去厰屋下拿……佢恬恬仔聽，笑笑仔領頭，摺若手牽核核，在心肝肚應你：該隻牛牯無田好耕，既經當久無綯在樹下哩；上店仔个頭家十過年前就徙去臺北同厰俵仔共下歇咗；你掛心个阿蘭老妹大前年先去天頂同爺哀做伴咧。

燒暖个朝晨，兩子哀行在熟絡个街路，講天講地講過去，就係無現下。時間个長河定定仔沖落你記憶城堡个一磚一瓦，但係沖毋開佢摺你牽核个手，沖毋散佢兜相陪伴个幸福。

編號 4 號

【行醫一生人】黃美貞原作

公館愛去出磺坑个臺六線路脣，有一間日本式个屋仔，外壁係灰白色个洗石仔，屋面前有細細仔个花園，看起來就當有歷史，名仔安到「福基診所」，肚項有一個既經做阿太咁个謝春梅先生，佢從一個全臺灣盡後生个醫生做到變成盡老个醫生，用一生人來看顧苗栗鄉親个康健。

阿梅先生係日本時代出世个，厥爺仔做佃農畜一屋下大細，生活纏綿繃仔。厥婆發病仔異多年，輒常痛到睡毋落覺，乜毋盼得去分先生看。有一日，肚屎痛到奈毋得，正請醫生來，無想著開个係死亡證明，毋係藥方，這件事情對阿梅先生影響當大。故所，佢小學出業就去醫館跔人學師仔，經過八年个自學同實際經驗，正通過高考。因爭厥爺仔个一句話，「莊下無先生，愛轉來分大家打幫」，佢就放忒大都市个發展機會，轉來故鄉。

正光復該下，交通當毋利便，佢一接著病人个通知，無第二句話，麼个山坑咁見角¹，透夜仔點火油，趕兩三點鐘个路，明知病人無錢，無定還愛倒墊，阿梅先生乜拚等去，天光正轉到屋

下，係輒常个事情。該央時大環境當差，病人三股有兩股係用記數个，過年前，實在無長²著錢來拆數³，就捉一隻雞仔來堵數⁴。故所，講著阿梅先生大家就當說，一家五代從細看到大，還有第一個接生个嬰兒仔，現下變成厥个好朋友，乜有在外背做頭路，還跔工轉來分阿梅先生看病个，佢兜講：「哪就看毋著，看著阿梅先生，病就好一半哩。」

民國三十七年个年三十暗晡，有三個細人仔發蛾仔，送到診所急診，好得閒時有準備，佢遽遽拿出貴參參仔⁵个血清，正救著三條寶貴个生命。有恁樣个經驗，阿梅先生長透講：「做醫生毋係為著賺錢，係愛來救人个！佢就像便利商店，無放棄全年服務。」有人問佢哪久愛退休？佢講：「做到做毋來正會停。」確實有影，一年透天，無麼个年初一、星光半夜，病人來尋佢，佢一定親身迎接，解除病人个痛苦。

這日暗晡，福基診所傳來一陣紙炮仔聲，九十九歲个老醫生離開大家也，照客人个傳統來講，係通知隔壁鄰舍，還有送行个意思。行醫一生人，對待病人像自家人个醫德，值得俚後輩來思念同學習。

² 長：音 diongˋ；多、剩餘之意。

³ 拆數：音 caŋˋ sii；還帳。

⁴ 堵數：音 duˋ sii；抵帳。

⁵ 貴參參仔：音 gui semˊ semˊ eˋ；貴得很。

¹ 咁見角：音 gaŋˋ laŋˋ goŋˋ；指狹窄偏僻的地方。

編號 5 號

【阿姆个雙手】鄧秀鳳原作

從來就無想過，從細捕倅、渡倅、牽倅个這雙手，有一日會放忒，就恁樣看毋著、摸毋著哩。

記得七歲時節，阿姆牽等倅去學校讀書，放學轉來捉等吾手教倅寫字，還會摺倅編毛辮仔。倅係在外背分人欺負，會遽遽摺倅掉目汁，還緊講目汁斯係血毋好恁好嗽。

等到倅兜兄弟姊妹讀國中時節，阿姆打早就䟽床，摺倅這兜準備豐沛个便當。到當晝食飯時節，同學儕儕圍等過來，緊講仰恁香、恁錫人食，害佢兜口涎水緊吞，想食到口涎水落落跌哦！

講著吾姆个手藝，正經斯無簡單哦！輒常灶下無麼个菜，到菜園迂一輪¹轉來，飯桌頂又係一桌豐沛。尤其過年過節愛打版仔，甜版、發版、假喜仔、菜頭版、水版仔、紅版、艾版、米粽、版粽、煥粽，阿姆个手像會變奇術樣仔，麼个版都會打，有成時落水時節，毋使出門去做茶園事，隔壁鄰舍就會湊等來打鬥敘，最暢个就係倅兜這群細人仔，毋使出門做事，還有當多好食个點心好食。

記得有一擺也係落大水个朝晨，吾哥聽著屋頂叮叮咚咚落水个聲，就當暢喊講：「還好哪！落水哦！毋使去茶園做事唷！」阿姆在灶下聽著就大聲應講：「倅係毋煮分你兜食啊，看你兜還會暢無？」

阿姆這雙手正經無簡單，後生時節屋下一大堆雜事愛做，像畜豬仔、畜雞仔，煮飯、洗衫、又愛渡一群細人仔，逐日像極樂仔挨毋會停，逐日都做到兩頭烏。

等到倅兜這群慢慢仔大咗，各各嫁人个嫁人；討舖娘个討舖娘，儕儕有自家个生活，各人有各人个事業家庭。阿姆个年紀無算盡老，正七十零定定。這年過年阿姆行路緊來緊慢，手也緊來緊無力，緊來緊像「細人仔」，有時節當得人惜，有成時又亂講話，害倅兜又好笑又好譴。

雖然係恁樣，倅兜兄弟姊妹總係恁樣想，做得牽等阿姆，摺阿姆个手搭到纏纏，就係最大个幸福。

半夜無胚想著，該日正放暑假个臨暗仔，阿姆食咗幾口飯，就恬恬目眨眨憑等。毋管倅兜仰般喊、仰般搖，阿姆還係恬恬無回答。這時節倅正知，阿姆毋會醒過來哩，毋會牽倅个手，毋會過摺倅講戇話哩，也毋會嘍嘍嘍哩。

¹ 迂一輪：音 din' id` lin'；繞一圈。